

Nº 1

Januaro - Julio 2003



KURIERO INTERNACIONA



Redaktero: Jean Martignon

Imprimita en Europa

KURIERO INTERNACIONA, N° 1 Januaro-Julio 2003

Redaktero:

Jean Martignon,
12, rue Maurice Utrillo, F-91600 Savigny sur Orge
Francia - France
elektronika adresi:
<jeanmartignon@minitel.net>
<martignon.jean@wanadoo.fr>

VORTO DAL REDAKTERO

Me prizentas LETRO INTERNACIONA sub nova formo titulizita KURIERO INTERNACIONA. Ico esas experimento. Se olu bone funcionos, me durigos ol. Ma pro ke ica mikra buletino esas plu kustoza por produktar kam LETRO INTERNACIONA, ol esos future plu chera.

Me ne ja savas exakte quale esos la preco, ma me informos vi ye la venonta numero.

En L.I. ne povis esar longa artikli, camotive me opinionas ke experimento altramaniere esas necesa.

Sincere via JM

Kar amiko

Yen mea mikra buletino. Ol sucedas a mea cirkulero LETRO INTERNACIONA. Ol havas ankore multa defekti e me facis plura skrib-erori, ma me esperas ke tamen ol plezos a vu. Ne pagez ica numero nek la venonta. Erste dum la yaro 2004 me publikigos ol ye singla triesma monato ed ol kustos 10 euri. Me probos pokope ameliorar ol.

Amikala saluti. JM ::::-:::

EXTERTERANI EN NOVA ZELANDO

“En lua “Ancient History of the Maori” (Anciena Historio di le Maori), Nova Zelando, 1889, John White kolektis legendi dil Sudala Maro kun la skrupuli di ciencisto. Kande lu komencis redaktar sua verko en 1880, on raportis a lu multa prehistoriala historii qui transmisesis de unesma fonto a lu da la sacerdoti. Ja en lua unesma libro la temi traktata esis ube on devas serchar la origino dil prehistorio:

“La genealogio dil dei
La historio dil kreado
Milito en la universo
La kreo di homulo ed homino
La diluvio e raportaji pri la Archo
Mariaji inter dei ed homi
Voyaji inter la Tero ed altra steli
Nutrivi qui falis de la cielo.”

La legendo Rongamai koncernas tribuala militado. Pro timo desvinkor, la tribuo Nga-Ti-Hau serchis sekureso en fortifikata vilajo. Kande li minacesis da nevinkebla adverso lore la militisti Nga-Ti-Hau serchis la helpo dal deo Rongamai. Kande la suno esis ye lua zenito, la deo aparis.

“Lua aparis esis
quale brilanta stelo,
quale fairala flamo,
quale suno.”

Rongamal flugis super la vilajo e tervenis:

“La sulo movesis,
Nubi de polvo impedis nia vido
La bruisto grondis quale tondro,
Pose quale la impetuoza sono en musloskalio”.

Tale adportesis nova kurajo a la militisti per ica manifesto di forteso dal deo e li invadis lia astonata enemiki.

En la legendo di Tawhaki, la yunino Hapai decensas de la sepesma cielo por pasar la nokti kun "bela homulo". Ica selektita viro savas nulo pri la origino dil yunino; erste kande el esas grvida elu revelas la "vereso". El venas de distanta mondo trans ilua horizonto ube el havas la rango di diino. Lore, cesinte esar yunino, el naskigas filiino e pose retroiras aden la kosmo.

La diverseso de la helpi per qui la deaji envelopata da misterio retroiras a l'universo esas perplexiganta. Lore senfina skali uzesas, e pose desapararas ed esas nultempe rividita, lore turmi existas por helpar la starto, altrafoye araneo-teli o vito sarmenti esas sate forta por irigar la voyajeri adciele, ma li esas anke ofte transportata da uceli o draki, od eniras la vakua spaco sur kordi. Ma irgequa esez la raporto, olda muliero sempre asistas la departo. Squatanta sur la sulo, elu kontas terpomi. Elu avertas la deaji pri "la vento qua suflas ad-tere" e pose el jetas la terpomi aden la fairo, unope, non, ok, sep, sis, kin... La olda muliero facis reguloza konto retroe, exakte quale on facas nunepoke che Spacocentro."

Extrakturo de la libro L' ORO DIL DEI da Erich von Däniken.



SILVESTRO II, LA PAPO AMIKO DIL DIABLO

Il naskis inter 935 e 940 en tre povra familio e nomesis Gerbert. On raportas ke dum lua puereso il gardis mutoni ed observis la steli kande nokteskis, per speco de serbatano facita ek kavigita sambuko-brancho. Or, uladie dum ke il regardis talmaniere la cielo, monaki preterpasis e remarkis lua konduto. Li facis questioni a lu e konstatis lua granda inteligenteso, konseque li adoptis lu kom studento en la monakerio por divenor plu tarde suafoye monakulo. Ma, dum 967, la komto di Barcelona vizitis la monakerio. Pro ke il esis la maxim brilanta dicipulo dil monakerio, la komto demandis forduktar lu kun il en Katalunia. La monaki aceptis e Gerbert durigis lua studado probable per lernar la scienci dil Arabi, qui lore posedis preske tota Hispania, ed havis kulturo- e scienco-niveli tre supera ad olti dil westala Kristani.

Pos lua sejourno en Hispania, Gerbert iris a Roma ube papo loannes III komisis lu docar muziko ed astronomio. Un ek la dicipuli esis Otto, evanta dek-e-sis yari, filiulo dil imperiestro di Germania ed Italia. Samatempe, Gerbert duris studiar e laborar ciencale. Il inventis, inter altri, hidrolika* orgeno en qua la vento kompresesis per la preso dal aquo. Koncerne la horloji il kreis la mekanikala sonigado e la kloki qui esis silencoza ante ilu komencis kantar. Ico ne impedis il redaktar verki pri filozofio ed alta teologio. Ma dum ita nesavotempo, kande, segun eroroza intelekto dil Santa Skriburi, on ne darfis studiar scienci e progresigar oli, on konceptis lua lerno-avideso kom diablajo. Precipue che sacerdote. Ica viro dotita per "superhomala inteligenteso" rapide akuzesis signatir kontrato kun la diablo.

Lua infernala reputeso debesas a kelka biografiisti, precipue al Angla monako William of Malmesbury, autoro da historio, en la Latina, pri la Angla reji. Ica monakulo savigas a ni ke, en Hispania, Araba magiisto docis lua scienco al yuna Gerbert, ma refuzis donacar a lu precoza verko qua kontenis la reguli di lua savo. La Arverniano seduktis lore la filiino di lua instruktisto, ebriigis lu, e furtis la libro. Il (Gerbert) signatis protektokontrato kun la diablo qua garantiis a lu vivar sendanjere, tam longe kam il ne oficios la meso en Ierusalem. Satano rezumabis lua destino per atribuar a lu tri faira literi: R... R... R...

Pos ica seĵorno en Roma, il sendesis ad urbo Reims, Francia, kom chefo di monakeriala skolo. Dum ok jari (972-980), il docis filozofio e gramatiko, samatempe il esis sekretario dil episkopo Adalberon e tale, implikesis en diversa aferi quin l'episkopo mustis negociar. Talmaniere, il komencis okupar su pri politiko. E Reims justifikis lua unesma R.

En 981 Adalberon venigas lu kun su en Italia e nominigas il kom chefo dil abadeyo di Bobbio, apud Pavia, ma la vivo-kondicioni ibe esas tante mala ke lu balde preferas retroirar a Reims. Dum ita iterita seĵorno, komto di Paris Hugo Capet konfidas a lu la edukado di lua filiulo Robert, qua plu tarde kvalifikesos kom "Pia". Or, dum 987 la trono di Francia divenis vakanta. Gerbert lore donis a la nova reĵo saja konsilo, nome elektigar e sakrigar, dum lua vivo-tempo, ilua filiulo kom lua sucedonto. Tale komencis la dinastio di le Capet qua esis havonta dek-e-quar suvereni.

Gerbert ne okupesas nur pri la aferi di Francia. Danke lua mediaco, lua anciena dicipulo Otto divenas mastro di Saxonio. Ulte lo il impozas a la kombatema potenti di sua tempo la "milito-halto di Deo" e koaktas li obediar la unesma milito-legi.

Dum januaro 989, lua mastro e protektero Adalberon mortas. Lu remplasesas da Arnoul filiulo dil duko di Lotringio e Gerbert esas lua sekretario. Ma lu revokesis pro politikala intrigi e Gerbert succedas lu kom episkopo. En 996 Otto, mastro di Saxonio proklamesis Imperiestro di Germanio e Reĵo di Italia kun la titolo Otto III. Un ek la unesma agi dil nova mastro di Roma esis obtenar de papo Gregorius V la arkiepiskopio di Ravenna, lore duesma urbo di Italia. Tale justifikesas la promiso dil duesma R.

Or, ye la 18ma di februaro 999, quankam il evis nur duadek-e-non jari, papo Gregorius V mortis subite. Forsan lu asasinesis. Otto III qua pilgrimis che la monto Gargan retrovenis rapidege a Roma por evitar l'elekto di enemika papo. Lu havis nula defacilaji por elektigar lua anciena docisto kom heredanto dil trono di santa Petrus.

Otto konsilis a lu adpotar la nomo Silvestro II pro ke l'unesma Silvestro baptabis Konstantinus t.e. la unesma Knistana imperiestro. Tale il atingis la triesma R.

Gerbert guvernis quiete urbo Roma, tamen lua Angla biografiisto, William of Malmesbury, raportas:

“Esis proxim Roma, che la Marso-Agro, statuo ek bronzo o fero di qua la indik-fingro di la dextra manuo esis tensata, ed on lektis sur lua kapo: fraprez adhike. Homuli, qui persuadesis ke ica vorti indikas la existo di trezoro, mutilabis per hakilostroki la senkulpa statuo. Gerbert donis a la enskriburo altra senco. Ye dimezo, kande la suno esas en la mezo di lua jornirado, lu examenis til ube la ombro dil fingro prolongesas e lu retrovenis dum la sequanta nokto akompanata da servisto portanta lanterno e da plura altri. Li exkavis la tero per ordinara utensili. Larja enireyo apertesis avan ili. Li perceptis vasta palaco, ora muri, ora plafono; ora soldati kun ora kurasi; ora rejulo e rejino an tablo. Li anke vidis servita dishi e stacanta servisti. En angulo esis admirinda karbunklo qua desaparigis la tenebro. Ye l'opozita angulo esis stacanta infantulo armizita per arko. Tale, omnaloke marveloza arto plezurigis la okuli, omnon on vidis, ma nulon on darfis tushar. Quik kande ulu volis agar per sua manui, omna statui tresayis ed esis pronta atakar la audacozo. Gerbert, pavorigita, retenis sua deziri. Ma un ek la servisti ne povis impedisar furtar admirinde laborita kultelo. Ye l'instanto ipsa, omna personi staceskas, la infantulo lansas sua flecho kontre la karbunklo qua extingesas, omno rifalas en tenebro...”

Gerbert guvernis Roma e la Kristanaro tre saje. Segun la kontrato quan ilu signatabis kun la diablo, il ne devis mortar ante dicar meso en Ierusalem. Lu do esis tote quiete e ne hastis irar a la Santa Lando. Ma dum sundio dil yaro 1003, kande il celebris meso en Roma, ye la “Ite missa est” lu subite standis male, lore lu konstatis ke lu esas en kirko nomizita “kirko di Jerusalem” e ke la korista puero extingas la ceri. Il falas, quaze frapita per fulmino.

Lua sucedanto, Sergius, grabigis sur lua tombo longa epitafo ube on poyas lektar yena texto per mayuskula latina literi:

CA LOKO UBE ENTERIGESAS LA RESTAJI DI GERBERT RIVIVOS KANDE LA SONI DIL TRUMPETI DIL MONDOFINO ANUNCOS LA VENO DIL SINIORO DEO. LA SANTA VIRGINO QUA FAVORAS LA ARTARO E ROMA, URBO QUA ESAS LA KAPO DIL MONDO, IGIS LU FAMOZA EN LA TOTA UNIVERSO... LU ESIS QUAZE LA PORDISTO DIL CIELO POS CHANJIR TRIFOYE LUA OFICO. IL OKUPIS DEPOS YARKINO LA OFICO DI PETRUS KANDE LA MORTO FRAPIS LU. LA TOTA MONDO EXTREME PAVORIS. DESAPARIS LA PACO E LA TRIUMFANTA EKLEZIO SHANCELIS. OLU OBLIVIIS LA REPOZO... IRGEQUA TU ESAS, TU QUA REGARDAS ICA TOMBO DICEZ OMNAPOTENTA SINIORO DEO KOMPATEZ LU. LU MORTIS DUM LA YARO DIL SINIORO-INKARNACO MIII (1003) YE LA XIIma (12ma) DIO DIL MONATO MAYO.

Arvernia mantenas tre vivanta la memoreso dil papo qua, forsan, esis magiisto.



BIBLALA RAPORTAJI ED ERUPTO DI VOLKANO

En decembro 2002, B.B.C.-programo asertis ke la teroriganta volkano-erupto dil insulo Santorini en cirkum 1450 a.K. esis la origino di multa raportaji en la Biblio. Oceanografiisto D-ro Daniel Stanley kredas ke ta erupto, forsan 1000-ople plu potenta kam nukleala bombo, tote certe produktis fortega bruisto e falado de cindri tra vasta parti di la vicina landi.

Samtempe la erupto-violento tote destruktis la bela kulturo di la Minoani qui habitis la vicina proxima insulo Kreta.

Per komputor*-simulado, klimatologiisto Mike Rampino montras ke ta erupto anke povas explikar la diversa plagi qui devastis Egiptia. La cindri okultacis la suno-lumo e la jorno divenis nokto, ed lo esis moyeno produktar fulmino e grelo. Pose, la pluvo cesis e longa sikeso sequis. La Nilo-fluvio per la polutado da la cindri divenis nociva e chanjesis a reda koloro (recenta dizastro en Usa produktis la sama efekto). Konseque granda nombro de rani mortis ed atraktis mushi e lausi. Ta insekti adportis morbi a la bovaro e tale anke a la homi qui sufris pro furunkli e veziketi.

Kande Moses guidis l'israelidi ek Egiptia, la Reda Maro evidente retretis. Tamen existas teorio ke pro mistraduko, la reala voyo esis tra neprofunda marsho, la Maro di Kani (en la Angla The Sea of Reeds).

L'inundo qua dronis la persequanta soldati esas altra rezulto di l'erupto. Enorma mareala ondo genitesis, kun alteso de cirkum 200 metri e rapideso de 600 kph. Tamen kande ol ganis la delta di la Nilo, la alteso esis nur ye 2 metri, ma la longeso esis ye 160 kilometri. Tal amaso de aquo povis plenigar la fluvio e kovrar l'agri.

Tal eventi, lore nekomprenebla a la desfortunoza habitanti memoresis da multa generacioni, quankam tre probable la indikita tempi esis kelke nekorekta. Koncerne l'Israelidi li kredis ke lore esis la "manuo di Deo" qua montris signo ke li mustas retrovenar a la "Promisita Lando".

Onu ne povas astonesar ke ta kataklismala tempo produktis multa ne-obliviebla naraci, miti e legendi. Eventuale skribita versioni divenis parto di la Biblio ed altra santa libri.

Segun la B.B.C. da Richard Stevenson.



LA MISTERO DIL OBLIVIATA VILAJETO

Kande me redaktis PROGRESO, me komencis publikigar ekstrakturi de libro pri Druidismala raporto. Me mustis cesar la redakto di PROGRESO, ma me ne renuncas pri la traduko di ca libro ad Ido. Me itere komencas la publikigo di ol.

Chapitro I

- Ka sioro Paul esas hike ?

- Yes! me decensas!

Pos irir rapide ye la infrajo dil eskalero, me enirigas la simpatiinda funcionero qua de 17 yari adportas en mea preurbo bona e mala informaji.

- Saluto sioro letro-portisto. Quon vu donas a me? Kad ulo interesiva?

- Nu, dicez a me, sioro Paul, kad ico destinesas por vu?

Dume il prizentas a me letro qua trovesas en la kayero dil "rekomendata" postolivraji. Ica letro esas tote surskribita per manuskripta enskriburi ek omna kolori e per multa tamponizuri:

"A s-ro Emile Bauchet
58, rue St- Jean en Dunkerque"
(Kaze di marto me pregas transmisar ico ad ilua seniora filiulo)

Astonata me regardis, dum instante la makulizita kuerto.

- Yes! Ne esas dubo, ita esas sendita a me!

- Nu! Esis longa irado ante ke ol atingas vu! Ed esas tamen homi qui asertas ke la postoservo funcionas nebone!

- Me ne plus dicas lo, sioro letro-portisto, nam mea patro mortis 25

yari ante nun (en 1918), e me chanjis multafoye di lojeyo ante habitar hike...

Ka sigareto?

- Predanko! Lo esas tre rara nunakloke par refuzar ico. Kad vu signatis? Til morgo, sioro Paul!

Kun mea letra enmanue, me izolas me en mea skribo-chambro e, pos agitir ankorefoye la misterioza kuverto, sorgoze, per stroko di posh-kulteleto, me apertas la precoza dokumento.

Dufoye, trifoye, me rilektis la tre stranja epistolo dum questionar me kad me ne esas viktimo per joko? Tamen no, onu ne imaginus tala jokacho, qua segun la titulo dil adreso nule devabus atingar sua viktimo.

Louis Auguste Futaies... lo ne esas posibla... ito savesus... e tamen... Me iras por konsultar mea spozino!...

Nu, karino, ka tu bone sidas en tua fotelo? Ka tu ne falos surdorse?... lore askoltez!

Sidanta apud mea mariajino por ke ni povez vidar kune ica astonanta letro, me lektas laute:

Perrière, ye la 14ma junio 1943.

Mea kara Emile,

"Me ne presavas ube e kande ica mesajo atingos tu, ma me esas certa ke ica letro recevesos da sua destinario a qua me esas nekonocata, nam ol *mustas* livresar ad il, mem pos tua morto, mem pos olta di tua filiulo pro ke vi probable subisis, l'unu e l'altru, la maxim mala aflikti dum l'una o l'altra de la du militi qui devastis ica kompatinda urbo.

Mem se ito povas esar tre astonanta por tu, me esas tua onklulo Louis Auguste, naskinta ye la 20ma aprilo 1823 en Bourbon-Vendée, e desaparinta ye la 23ma decembro 1870. Me skribas a tu cadie en vilajeto tote nekoncata, e tu serchos vane lua nomo sur la moderna mapi di Francia, mem sur la stabala di ca departemento Eure-et-Loir.

Me ne plus vivos ankore dum longa tempo e me deziras rividar tu, mea kara Emile, ante departar por explikar mea agi a Deo, nia Mastro di omni.

Pro ke tua evozeso impedos tu venar tu mea lojeyo en ica nekoncata e desfacile acesebla vilajo, me demandas a tu komisar ica tasko a tua filiulo, o, se ne posible a la senioro ek tua nepoti. Me vartos ankore lua veno dum kelka monati ante mortar.

Recevinde ica letro, mea kara nevulo, tu eniros, en Paris, l'omnibuso matinala por Dourdan e demandas bilieto por Perrière, suficante laute por audesar dal voyajanti.

La vehisto respondos ke il ne konocas loko tale nomizita sur la lineo; lore, nevulo mea, tu repetos tote laute: Ma, yes, Perrière les Chênes!

- Ka vu yolas irar a Perrière les Chênes? questionos lore un ek la voyajanti. Ka vu konocas ulu ibe ?

Respondinte: Yes mea onklulo, avo Louis, ica viro dicos a tu:

- Ka vu sayas ke vu arivos erste cavespere ye 10 kl. 30 cirkume?

- Konsentinte me sayas lo, tu respondos.

E tu agos segun la instrucionni quin ica guidanto transmisos a tu.

Malgre la nun existanta vivo-desfacilaji en nia Francia, quan me rividas triesmafoye invadita dum mea longa vivo, esez destranquila pri nulo. Me havas sat vasta lojeyo e posedas sat multa necesaji e nutrivi por aceptar mea nevulo, e, forsan, mea bonevino, til mea

tre proxima lasta dio, quan me expektas sen hasto e sen timo. Me esas deziroza esar sat forta por konversar kun tu.


Aceptez, mea kara Emile, la afecionoza pensi de tua olda, oldega onklulo.

Louis Auguste Futaies

P.S. Me obliviis rekomendar lo a tu, kunportez busolo.”

(duro sequos)

Traduko de libro redaktita da Paul Bouchet - Inter-Kelta Arkidruido.



TABLO DI KONTENAJO

Exterterani en Nova Zelando	pagino 3
Silvestro II, la papo amiko dil Diablo	pagino 5
Biblala raportaji ed erupto di Volkano	pagino 9
La misterio dil obliviata vilajeto	pagino 11

Se vu deziras havar konstante diala informi en Ido, lektez "diala jurnaleta" o "diala informaji". Taskope sendez vakua mesajo (sen objekto) a <idosstab-ubscribe@yahoogroups.com>

Por sendar mesajo a ta listo, voluntez uzar la sequanta adreso <idosstab@yahoogroups.com>